

Wárágà Pólò dré tisìle Tèsàlòníkèbhá i dré dhi ni rì

Wárágà kònìdhi ni tà àndu ngìle drìdrì dhi

Kònìdhi wárágà Pólò dré tisìle móndyá ka'ìbhá Tèsàlòníkè na dhi i dré dhi ni rì 'i. Wárágà kònìdhi léna dhi, akódhi adrè àwoyà ta Gìká dré Tèsàlòníkèbhá ki tà ka'ìka'ì ni tà sè ìndì àyi ki lèle sè, tágba à dré adrézó àyi ki mǐ pfo lavulé gò, ì dré adrézó kizà nya dhi. Adré kpà gòle Yésu ni agòma ni tà tadhá àyi dré, ngóro dré tá tadhálé àyi dré áyi wárágà ni àlo léna dhi tǐni. Tàko, móndí àruka ì adrè tá taa àyi dré kinzò sè dhi, kǐtú Yésu dré dra agòzo dhi atsa dre. Di Pólò adrè àyi ki lotó, adrézó taa àyi dré dhi, lè móndí zyandre dhi ì kòligí rè zyà Gìká rú gò, agó drìkònzì líyí ro dhi dré apfòzo 'íká gò, Yésu kàgòro ndò. Adré di àyi ki kodzó, ì kàdréro àyi ki totó tātā, adrélé tròle tà dré tadhálé àyi dré dhi ì rú.

Adré kpà àyi ki kodzó, ì kòtayíró àyi adrélé tòbvo ró ko. Be ró dhi, ì kàdré àzì 'o ngóro dré tá 'òle àyi kòfalé dhi tǐni, ìndì ì kòtayí àyi adrélé landèle tà dóro 'òma sè ko.

Tà kàdrìkàdrì wárágà kònìdhi léna dhi ki aǐma

1) Mòdo fèma (1:1-2)

2) Àwoyà fèma Tèsàlòníkèbhá ki tà ka'ìka'ì ni tà sè dhi (1:3-12)

- 3) Tà tadhálé Yésu nì agòma nì tà dri dhi (2:1-17)
 4) Tà zǐma Gìká tí dhi, ìndì àzì 'òma (3:1-15)
 5) Mòdo kùdù (3:16-18)

Mòdo fèma

¹ Ma, Pólò, túmání Sílà ìbe ìndì Tímòtéyò be dhi ì, mà adré wárágà kònìdhi nì tisì Èkèlézyà Tèsàlòníkè na dhi dré, àmi adrèbhá Gìká àma kì Atá àdhya ró ìndì Mírì Yésu Krìsto àdhya ró dhi ì dré. ² Gìká àma kì Atá ì Mírì Yésu Krìsto be dhi ì kòbhà àyi kì togó tani àmi rú, ìndì ì kòfè tà kèdrìkèdri àmi dré!

Tèsàlòníkèbhá kì tà ka'ika'ì, ìndì tàbvó Gìká dré dra tàle gyágya lókyá kùdù sè dhi

³ Ama kì adrúpi ì, lè mà kàdré ngbú àwoyà ta Gìká dré àmi kì tà sè. Tà nda kòdhi gyágya, tàko ko, mì adré Gìká nì ka'ì togó wáyi sè adrézó lile ába drìdrì. Àmi tíí, mì adré kpà ru le àmi kòfalésè adrézó lile ába drìdrì. ⁴ Tà nda sè dhi, mà adré àmi kì tà ta drì be kuru Èkèlézyà Gìká àdhya ì kòfalésè. Mà adré tàá àyi dré dhi, mì adré Gìká nì ka'ì, adrézó togó tsi, tágba à dré adrézó àmi kì mǐ pfo lavulé gò, mì dré adrézó kizà nya dhi.

⁵ Tà nda kòdhi ì adré tadhá dhi, Gìká adré tàbvó ta gyágya. Tàko ko, kizà mì dré adrélé nyàle kòdhi ì sè dhi, Gìká nì àmi kì 'o kìtswalé áyi Opì mì dré adrézó kizà nya ásà dhi sè. ⁶ Tà bàti ró dhi, Gìká gyágya. A nì kizà logó móndyá adrèbhá kizà fe àmi dré dhi ì dré gò, ⁷ tà kèdrìkèdri afèzo àma adrèbhá kizà nya túmání àmi ìbe dhi ì dré.

A ni 'òá kònìni lókyá Mírì Yésu dré dra agázó bhù lésè áyi ángeló rinyi ró dhi íbe dhi tú. ⁸ Akódhi nda ni alì àtsí adrelépi kòle dhi na, kitswálé tà ño móndyá Gíká ni nibhá ko dhi i dri, ìndì móndyá àma ki Mírì Yésu ni Rúbí Tani gabhá 'òle dhi i dri. ⁹ A ni tà ño àyi nda i dri gyägya, àyi ki tupfúzó todràle kóná vèsè kólyá, i kàdréro vwàvwà ro Mírì rúsè, ìndì akódhi ni rinyí m̀lanzìlanzì ro dhi rúsè. ¹⁰ Tà nda ni ru 'o kítú Mírì dré dra agòzo kitswálé m̀lanzìlanzì kisú lindrì be móndyá lólo títi áyi ka'ìbhá dhi i vélèsè dhi tú. Amì ró dhi, m̀ni ni adré kókpa àyi nda i kòfalé, m̀ni dré kúlí mà dré longólé àmì dré dhi ki ka'ìle dhi sè.

¹¹ Tà nda sè dhi, mà adré tà zi àma ki Gíká tí àmì dré landè àko ró, kò'oró àmì kitswálé tà í dré àmì ki azízó ásà dhi sè, ìndì kò'oró tà dóro títi m̀ni dré adrelé lèle 'òle àmì ki tà ka'ìka'ì sè dhi i kitswálé títi áyi rinyí sè. ¹² Mà adré zìá kònìni, àma ki Mírì Yésu kòkisúró m̀lanzìlanzì àmì ki tà sè, ìndì m̀ni kòkisúró kpà m̀lanzìlanzì akódhi léna, àma ki Gíká i Mírì Yésu Krísto be dhi ki togó tani bhàle àmì rú dhi sè.

2

Tà dra ru 'obhá dr̀dr̀ Mírì ni agòma kandrà dhi i

¹ Ama ki adrúpi i, kàdré àma ki Mírì Yésu Krísto ni agòma, ìndì àma ki ru kimoma akódhi be dhi ki tà sè dhi, mà adré àmì ki kodzó kònìni: ² A kàdré tàá dhi, Mírì Yésu ni kítú atsá dre dhi, m̀ni kòtayí tà nda àmì ki dr̀ kizá yà, kó ngalè àmì ki lindrì tigá yà dhi mbèlè ko. Gba à kàdré tàá dhi, tà nda apfò Tírì Lólo vélèsè yà, móndí ki kúlí

lésè yà, kó ngalè àma ki tàndi ki wárágà lésè yà dhi, mì kòka'ì ko. ³ Mì kòtayí àmi dhya àlo dré litilé ndìndì tà àlo sè ko. Tàko ko, kítú nda kitswá atsálé drìdrì mómí zyandre dhi ki ligìma Gìká rú dhi kandra ko, ìndì dhya drìkònzì líyí ro dhi ni apfòma kandra ko. Drìkònzì líyí nda, dhya adrélépi lèlè dràdrà kisú dhi 'i. ⁴ Akódhi nda ni ligí gìká títi mómí ì dré adrézó àyi ki lindrì bha dhi ìbe, ìndì ngá títi ì dré adrézó gìká nda ki lindrì bha ásà dhi ìbe gò, dré àyi bhàzo gìká nda ì drìlè títi. A ni ndìndì fì lírìlè Gìká ni tépelò na gò, adrélé tàà ngádra 'á dhi, àyi tàndi ìna Gìká 'i.

⁵ Lókyá má dré tá adrérà'a àmi kòfalé dhi 'á dhi, má tà zakó tsì tà nda àmi dré dhi 'í? ⁶ Dì nyànomvá dhi, mì nì tà adrélépi drìkònzì líyí nda ni apfòma kíkí dhi àdho 'i ya dhi be. Akódhi kitswá apfòlè ko, tsàlè lókyá ni dré dra kitswázó dhi 'á. ⁷ Tàko ko, rìnyí lùzu ró tàkonzì àdhya kìdhó adrélé tà 'o dre. Dì, dhya adrélépi rìnyí nda ni kíkí dhi ni go adrélé kíkíá, tsàlè lókyá dra akódhi ni tingázó dhi 'á. ⁸ Lókyá nda sè dhi, drìkònzì líyí nda ni apfò. Dì, Mírì Yésu ni akódhi ni pfu dràlè àyi la'a sè, akódhi ni tà 'òzo akílè àyi atsama lagulagu ró dhi sè. ⁹ Drìkònzì líyí nda ni atsá Sàtánà ni rìnyí be, adrélé tà twátwa líndrìga ró ìndì kinzò ro dhi ki 'obe. ¹⁰ A ni mómíyá adrèbhá lèlè dràdrà kisú dhi ki lití tà kònzì ki kára títi dhi ì sè. Àyi nda ki todrà akílè títi, ì dré tà bàti lèlè ka'ìlè adrízó ásà ko dhi sè. ¹¹ Àsà dhi, Gìká ni tà rìnyi ró dhi ni amù àyi ki lití, ì kòka'ìró tà kinzò ro dhi, ¹² í kòbhàró tà mómíyá títi tà bàti gabhá gò, ì dré lenzézó tàkonzì sè dhi

i dri.

Mì kàdré àmi kì totó tātā!

¹³ Dì, àma kì adrúpi Mírì dré lèle ni ì, lè mà kàdré ngbú àwoyà ta Gìká dré àmi kì tà sè. Tàko ko, Gìká kipè tá àmi kitswálé adrìlé drìdrì móndí àruka ì kandra, Tírì Lólo dré àmi kì bhàle lólo Gìká kandra dhi sè, ìndì mì dré tà bàti ka'ile dhi sè. ¹⁴ Akódhì azí àmi lídrì tídhí ro nda ni kisé Rúbí Tani mà dré longólé àmi dré dhi sè, mì kòkisúró àma kì Mírì Yésu Krísto ni m̀lanzilanzì be dhi bvó. ¹⁵ Dì àsà dhi, àma kì adrúpi ì, mì kàdré àmi kì totó tātā, adrélé tròle tà mà dré tadhálé àmi dré dhi ì rú, kàdré kúlí sè yà, kó ngalè wárágà sè yà dhi.

¹⁶⁻¹⁷ Ama kì Mírì Yésu Krísto ni tándì ì Gìká àma kì Atá be dhi ì kòtimbà àmi kì togó, rinyí fèzo àmi dré, mì kòkitswáró ngbú adrélé tà dóro 'o, adrézó kpà kúlí dóro ta. Tàko ko, Gìká nda lè àma tò gò, tà adrézó àma kì timbà nyo dhi ni afèzo àma dré tùmání tà mà dré adrézó mì bha àsà dhi be áyi togó tani sè dhi ni.

3

Pólò lizì Tèsalònìkèbhá kì ti, ì kàdréro tà zi Gìká tí í dré

¹ Kùdù ro dhi, àma kì adrúpi ì, mì kàdré tà zi Gìká tí àma dré, Mírì ni kúlí kàdréro la'úlè lèle drìdrì, ìndì móndí ì kàdréro kúlí nda ni no lindrì ro, ngóro tà nda dré adrélé àmi véna dhi t́ni. ² Mì kàdré kpà tà zi Gìká tí, kàpáro àma móndí kònzì adrébhá liglé í rú dhi ì drígásè. Angyá ko, móndyá títi dhi ì kitswá Gìká ni ka'í ko.

³ Di, Mírì kitswá ína adrélé ka'ile togó wáyi sè. A ni àmi ki timbà àmi ki tà ka'ika'ì na, adrézó àmi ki líkí Dhya kònzi ni tà sè. ⁴ Mà adré ka'íá Mírì na tàle dhi, mì adré tà mà dré adrélé tàle mì kò'o dhi ki 'o, ìndì mì ni go adrélé 'òá. ⁵ Mírì kàsé àmi ki togó í vélé, mì kònìró Gíká ni lèle bàti, adrézó kpà togó tsi, ngóro Krísto dré adrélé àmi ki fe 'òá dhi tìni.

Azì 'òma Pólò àdhya tìni dhi

⁶ Ama ki adrúpi i, mà adré àmi ki kodzó Mírì Yésu Krísto ni rú sè: Mì kàdré ru su àmi ki adrúpi adrèbhá tòbvo ró, adrèbhá kpà tà mà dré tadhále àmi dré dhi ki lebé ko dhi íbe ko. ⁷ Ami ki tàndì mì nì tàle dhi, lè mì kàdré tà 'o àmakya tìni dhi be. Angyá ko, àma tá àmakya tòbvo ró àmi kòfalé ko. ⁸ Mà nya tá kpà dhya àlo ni ngá àngyá ko. Be ró dhi, mà 'o àmakya àzì kòkóròko landèzo kítú be ìndì ngátsi be, àma ki tà kòlanzìró àmi ki àlo dri ko. ⁹ Tágba mà dré tá adrézó rìnyí íbe kitswázó ngá zi àmi tí bwà dhi, mà zi tá ngá àlo àmi tí ko, mì kàdréró tà no àma rú gò, adrézó 'òá àmakya tìni. ¹⁰ Tàko ko, mà dré tá adrérà'a àmi kòfalé dhi 'á dhi, mà lazí tá tà àmi dri kònìni: «Lè dhya adrélépi àzì le 'òle ko dhi kònnya ngá ko.»*

¹¹ Mà adré tàá kònìni tàko ko, mà adré yíá tàle dhi, móndí àruka àmi kòfalé dhi ì tayí àyi adrélé tòbvo ró. Àyi nda ì adré àzì 'o ko. Be ró dhi, ì adré àyíkya tífílé móndí ki tà ì 'àsè. ¹² Mà adré òni tà lazí móndyá làsú be kònìni dhi ì dri, adrézó àyi ki kodzó Mírì Yésu Krísto ni rú sè: Ì kàdré

* **3:10** 3:10 A kònò 1 Tèsàlònìkèbhá ì 4:11.

àzì 'o togó be lèrì, adrézó àyì kì tándì kì ngá nya kòdhya. ¹³ Dì, àmì, àma kì adrúpi ì, mì kòtayí àmì adrélé landèle tà dóro 'òma sè ko.

¹⁴ Dhya àlo àmì kòfalé dhi kàdré kúlí mà dré tisìle wárágà kònìdhi léna dhi kì ka'ì 'òle ko dhi, mì kònò akódhi nda dóro, adrézó ru su akódhi be ko, kanyò kò'oró akódhi be dhi bvó. ¹⁵ Dì tágba kàdré kònìni yà dhi, mì kònò akódhi àmì kì kàribhá ro ko. Be ró dhi, mì kàdré àmikya akódhi ni kodzó àmì kì adrúpi tìni.

Mòdo kùdù

¹⁶ Nyànomvá dhi, Mírì tà kèdrìkèdrì líyí ro dhi ni tándì kòfè tà kèdrìkèdrì àmì dré lókyá wáyì ì sè, ìndì láti wáyì ì sè. Mírì kàdré tùmání àmì íbe tíí.

¹⁷ Ma, Pólò, má adré kúlí kòni kì tisì áma tándì ni drígá sè, mòdo fèzo àmì dré. Má adré kúlí tisì kònìni áma wárágà tíí ì 'ásè, tadházóá dhi, má tisì ma.

¹⁸ Àma kì Mírì Yésu Krísto ni togó tani kàdré àmì íbe tíí!

BÚKÙ TÀ TÍDHÍ//RU YÌZO DHÌ ADHYA
Logoti (Logo): BÚKÙ TÀ TÍDHÍ//RU YÌZO DHÌ ADHYA
New Testament

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source files dated 29 Jan 2022

942af0a0-42ea-5477-8f1a-fed39823f32b